

太上玉清大洞玉經序

世傳文昌帝君得元始天王金像奉之遂邁三神人賜大洞經
誦經懇像圖報父母忽大洞法籙二書感夢而至竟臻上乘妙
果今大洞經羽士類能誦之大洞籙功令必受諸上清宮若大
洞法則概乎未有聞也嘉靖間我肅宗皇帝遣臺臣徧訪巖穴
乃奉上大洞符法當是時藏諸中祕世鮮有之卽有之又非人
不授則世之知者益鮮吾里中高士虛亭楊君至性孝友博綜
羣書少好爲子長遊溯沅湘涉秦淮而徜徉於大江巨浸之間
齋心習志神與道俱日捐貲周濟施食利幽一以焚修還丹爲
務精誠感格乃獲大洞符法於明菴劉散人散人嘗逮事世廟
道藏輯要

大洞玉經
序

五

底集三
卷之三

獨保奇祕未嘗輕出以示人感虛亭好道之誠出書授之楊君
恍然覺豁然悟如躬登鬱羅蕭臺之上覲蒼胡頡寶聆檀熾鈞
音也亟與其弟東渚君校正刊行於世余借計吏來邂逅伯仲
手出經示余俾作敘以弁首余夙佩籙譯經而恒以未覩符法
爲憾今具著冊籍炳如躍如詎非天幸哉楊君刊而傳之眞知
經與法籙旨矣且夫經文所闡咒籙所秉符法所運皆身中神
也吾身果一人身乎卽天地所付余身也卽億萬生人同得於
天地身也身之形殊身之神合修身中神則形神俱妙天地人
物皆吾身神矣迴風混合生天生地無人無我外身而有身身
可滅而無滅離神而有神神不存而常存以故總提玄黃包羅

象類把握幽明朗徹今古無窮已時而世之人乃卒昧之則以
莫相指示故也夫不知而不求知者惑也知之而不覺人知者
隘也覺之知而不知信者棄也知信而不求滿其知者畫也皆
非元皇開化意也是編顯布寰區庶幾哉人人知身一神一而
葆其同然之天矣楊君之功洵大矣哉後之幸有全知者慎毋
忘所自焉可耳

萬曆十一年歲次癸未冬月瀟水漁樵致陽子蕭允儒盥手書

道藏輯要

大洞玉經
序

六

氏集三
一七四